



Meeqqerivinnut ataatsimoorussamik anguniakkat takorluukkallu



Meeqqerivinnut, meeraateqarfinnut, angerlarsimaffinnilu paarsisitsisarnermi Qeqqata Kommuniata ataatsimoorussamik anguniagai takorluugailu, 2018-imi aggutsimit atuutilersut.

2010-miilli kommuni meeqqerivinnut anguniagalersuisarpoq. Nutaanik kommunalbestyrelsimi ilaasortaqalerneranut, kommunimilu nutaamik pilersaarusiornermi periusissiaqalernissaanut atatillugu ataatsimoorussamik anguniakkat takorluukkallu nutarterneqarput. Ataatsimoorussamik anguniakkat takorluukkallu, siornatigut anguniagaasimasunut taarsiunneqarput. Meeqqerivinni anguniakkat takorluukkallu kiisalu meeqqerivinni sinaakkutit ersarissarneqarnissaat anguniagaavoq. Tamaalilluni anguniakkat takorluukkallu meeqqerivinni sulisunut atuisunullu ataatsimoorussamik sakkussatut atorneqassaaq.

Inatsisit politikkillu:

2017-imit 2021 tikillugu Qeqqata Kommuniani suleqatigiinnissamik isumaqatigiissut, Oqartussaaneq, ataatsimoorneq ineriartornerlu kiisalu FN-p meeqqanut isumaqatigiissutaat aallaavigineqarput.

Qeqqata Kommuniani Meeqqanut inuusuttunullu politikki 2010-mi aprillimeersoq kiisalu Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut Inatsisaat nr.16.3.dec.2012-meersoq.



Siunertaq pingarneq:

Paarsinissamik neqeroorteqarnitsinni meeqqat sulisullu toqqissisimanermik tapersorsorneqarnermillu misigitillugit, ineriartortissinnaallugillu meeqqanut pitsaasumik sinaakkusiinissaq anguniagaavoq.

Ilaqutariinneq inuiaqatigiinni aallaaviuvoq. Angajoqqaat akisussaaffimmik tigussisapput qanilaartuullutillu, meeqqallu tamarmik ilaqutariinni toqqissisimasumi, angajoqqaat killiliisinnaassuseqartuni alliatornissaminnut periarfissaqassapput. Ataatsimoorluta meeraq tasissiullugu aqutissiuutissavarput.

Takorluukkat:

- Angajoqqaanik ataavartumik attaveqarsinnaaneq, meeqqanullu ataasiakkaanut ernumaatit pillugit nassuiaanissamut sapiissuteqarnissaq piumassuseqarnissarlu
- Meeqqat pinngortitamik atorluanaanissaannik paarsinissaannillu ilinniartikkumallugit, pinngortitami timimik atuineq pinnguarnelru annerusumik sammineqarnissaat
- Meeqqat amerlanerusunut atualernissaminnut piareersimaqqullugit, meeqperiviit atuarfiillu suleqatigiinnerisa pitsanngorsarneqassaaq
- Perorsaanermi nutaanik ilisimasaqalersitsissutaasunik sulisut piginnaasaqalersitsisunik pikkorissarneqassapput.





Perorsaanermi anguniagassat:

"Meeqqanut suli atualersimanngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut nr. 16, 3. december 2012-meersoq" siunertaraa, meeraq qitiutillugu meeqqamullu angajooqqaatut oqartussaasut/meeqqamik pilersuisuiusut suleqatigalugit meeqqanut ataasiakkaanut annertunerpaamik pitsaanerpaamillu ikorfartuinissap qularnaarneqarnissaa, tassuunakkut meeqqap peqqissumik imaqarluartumillu inerikkiartornissaa qulanaraarumallugu.

1: Meeqqat inersimasullu peqatiginerisigut, akuersaarinnikkut tusarnaarsinnaanerisigullu meeraq ineriartortinneqartarpoq. **Meeqqap inuttut ineriartornissaanut** meeqqeriviit tullinnguuttutigit tapersersuissapput:

- Meeqqap nammineq misigissutsimik oqaasertaliisinnaanissaanut.
- Meeqqap nammineq sanngiiffimminik nukittuffimminillu akuersaarsinnaanissaanut.
- Meeqqap imminut tatiginerulernissaanut.

2: Isumagineqarneq ataqqineqarnerlu, taamatuttaarlu inersimasunut meeraqatinullu attaveqarnikkut inuttut piginnaasat ineriartortinneqartarput. **Meeqqap inuttut piginnaasaasa ineriartortinneqarnissaannut** meeqqeriviit pinnguartsisarnermikkut sammisassaqaartitsisarnermikkullu tullinnguuttutigit tapersersuissapput:

- Nammineq inoqatillu timikkut tarnikkullu sanngiiffiinik akuersaarnissamut.
- Allanut paasinnissinnaanissamik ataqqinninnissamullu.
- Allanik peqateqarnissamut.

3: **Meeqqap oqaaserisaanik nukittorsaaneq inerisarneqassaaq**, misigissutsit, eqqarsaatit isummallu ersarissarnissaannut atorsinnaasarparput timi, assiliartaliineq, allanneq aamma oqalunnikkut. Taakkunuunatigit meeqqeriviit tullinnguuttutigit tapersersuissapput:

- Isummat misigissutsillu oqaasertalerneqartarnissaannut.
- Illuatungeriit oqaluutsillugit tusarnaartillugillu oqaloqatigiinnernut meeqqap peqataanissaanut.
- Erinarsornissamut, erinarsorluni pinnguarnissamut, assigiinngitsunillu pinnguarnissamut.

4: Timi maluginiutaalu misilittakkanut, ilisimasanut, misigissutsitigit inuttullu kiisalu attaveqarnissamut tunngaviliisuvoq. **Meeqqap timaata aalaasiatalu ineriartortinneqarnissaanut** tullinnguuttut aallaavigalugit meeqqap timiminik nuannaarluni atuinissaanut meeqqerivik periarfissaqaartitsissaaq:

- Pinnguaatit maluginiutinut ineriartuutaasut
- Sammisassaqaartitsinernut pussussornikkut avatinillu unammillernartunik atuinikkut.
- Meeqqap naammagittarsinnaaneranut unammillernartunik timi atorlugu sammisassaqaartitsinissanut.
- Nerisassatut siunnersuutit qulit aallaavigalugu peqqinnartunik nerisartaqartitsinissamut.



5: Meeqqap maluginiutini atorlugit aamma pinnguarnikkut, misigisaqarnikkut, unammillernartukkut ilisimasaqarnikkullu pinngortitaq ilinniassavaa. **Meeqqap pinngortitamik ilisimaarinninnissaanut** meeqqerivik:

- Ukiup qanoq ilinerini tamani sammisaqarnissamik pisuttuarnissamillu neqerooruteqartassaaq.
- Inersimasunik pinngortitamik nuannarinnittunik, pinngortitamullu tunngasunik atorluanaanermillu ilisimasaqartunik meeqqat naapisinneqartarnissaannik periarfissinneqartassapput.
- Meeraq pinngortitamut avatangiisinullu ataqqinninnissaanik akisussaaffe qarnissaanillu ilinniartissallugu.

6: Kulturi tassaavoq imminut nunarsuarmioqatinullu paasisimaqassuseq. **Meeqqap piorsarsimassutsikkut kinaassusiata ineriartortinneqarnissaanut** assigiinngitsunik sammisassatigut pinnguaatitigullu meeqqerivik piorsarsimassutitsinnut, oqaluttuarisaanitsinnut, ileqqunut allatigullu tunngasunut tullinnguuttutigut neqerooruteqartassaaq:

- Kinaassutsimut sunniuteqartuusut: Kalaallit Nunaanni illoqarfitsinnilu ileqqutoqqat ullutsinnut nerisanullu tunngasut.
- Allat piorsarsimassusaannik paasinninnissamut periarfissaqartitsinikkut.
- Nammineq kulturikkut pingaartitat pissusissamisuginnartumik tulluusimaarutigineqartarput.

7: Ulluinnarni meeqqerivimmi qarasaasiamik atuinissamik ilisimasaqarnikkut, atuisarnikkullu qarasaasiamik atuinissamut piginnaasaqarneq ineriartortinneqartarpoq. Ipad ulluinnarni perorsaanikkut sakkuusut ilaattut atorneqassaaq, taamaanneratigut atuinissamik ilisimasaqarnikkut, atuisarnikkullu qarasaasiamik atuinissamut piginnaasaqarneq ineriartortinneqassalluni. **Meeqqap qarasaasiamik atuinissaminut piginnaasaqarnera annertusiumallugu**, sulisut pinnguarnikkut sammisaqarnikkullu meeraq:

- Qarasaasiap atortuinik paarsilluarsinnaanermik, qarasaasianillu atuinissamut malittarisassanik ilinniartittassavaa
- Kaammattorneqassapput meeqqat ilikkarnissamut soqutiginnilersillugit
- Internetsikkut paasissutissanik ujartuisinnaanermik, paasissutissanillu pissarsianut inerniliisinnaanissamik ilinniartissavaa
- Tapersersuilluni ineriartortitsilluni meeqqat misileraanissaannut misissuinissaannullu periarfissiilluni



Meeraq pillugu suleqatigiinneq

Meeqqat immikkut pisariaqartitsisut pisariaqartitsinertik naapertorlugu tapersorneqarnissaannut meeqqerivinni sulisut peqataassapput, soorlutaaq immikkut suliniutigisariaqartumik meeraq ajornartorsiuteqarnersoq angajoqqaavi suleqatiginerisigut eqqummaariffigissallugu.

Meeqqap immikkut tapersortariallip ikiorserneqartariallillu siusissumik ataqatigiissumillu suliniuteqarfiginissaa qulakkeerumallugu, angajoqqaat suliallu akimorlugit suleqatigii ataatimiittassapput.

Naliliineq uppersaasersuinerlu:

Meeqqeriviup meeqqat ataasiakkaat inerikkiartornerat pillugu ataatsimoortumik naliliinikkut naliliinerit uppersaasersuinerillu ingerlaavartumik isumagissavai, meeqqallu inerikkiartornera minnerpaamik ukiumut marloriarluni allaaserisassallugu.

Meeqqap pingasunik ukioqalernerani peqqissusaanik inerikkiartorneranillu tallimanillu ukioqalernerani atualernissamut piareersimassusaanik pinngitsoorani misissuinissaq.

Meeqqerivimmiit – Atuarfimmu Ikaarsaarneq

Suliaq ingerlanneqassaaq atuarfimmu ikaarsaariarlunissaq siunertaralugu piginnaasat tungaviusut ilikkariartornissamullu kajumissutsip inerisarlugillu tapersorneqarnisigut, aamma meeqqap inooqatigiissutsikkut nalinginnaasumillu pisinnaasanik pigiliussiniarnerani kaammattuillunilu inerisaanikkut.

Meeqqat atualertussat, meeqqerivimmi perorsaasoq peqatigalugu ulloq naallugu, aappasaanilu angajoqqaatik ilagalugit 1. klassimi atuartunut pulaartittarnerisigut, meeqqeriviit atuariillu suleqatigiittassapput. Meeqqat atualersussat atualertinnagit atualernissaminnut piareersimanersut paasiniaarlugu marloriarluni misissuisoqartassaaq.



Meeqqap mappia

Meeqqap paaqqinnittarfimmiit/meeqquerivimmiit allamut nuunnerani meeqqerivimmi meeqqap qimataani sulisut meeraq pillugu paasissutissanik naapertuuttunik suliffeqarfimmut nuuffiusumut ingerlatitseqqittassapput meeqqap pisariaqartitai isumagineqaqqullugit.

Meeqqat tamarmik immikkut "Meeqqat mappianik" peqarput ukuningga imaqartussamik: perorsaanermi qanittumi, misissuineri atortunik, suleqatigiit atatsimiinneranni imaqarnilianik aammalu meeqqap ilikkarniarneranut, inerikkiartorneranit imaluunniit inuuniarnikkut unammillernarsinnasunut paasissutissat naleqquttut.

Meeqqap mappia kingusinnerusukkut atualerluni atuarfittaavanut nuunneqassaaq, ulluuneranilu neqeroorutinit tamakkiisumik peerneqassalluni.

Angajoqqaanik suleqateqarneq

Meeqquerivinni kommuninit ingerlanneqartuni tamani pisortap minnerpaamik ukiumut pingasoriarluni atuisut ataatsimoorfiat ataatsimiigiaqqusassavaa, taakku tassaapput meeqqamik pilersuisuiit tamarmik meeqqerivimmilu sulisiut.

Meeqquerivinni sulisut angajoqqaanik suleqateqarnertik attatiinnassavaat, tamannalu ilaatigut ulluinnarni, ilaatigullu atuisut ataatsimoorfii aqutigalugit ingerlanneqassalluni.

Ataatsimoortumik eqqartugassat eqqartugassanngorlugit, meeqqeriviit ataatsimoortumik angajoqqaanik ataatsimiisitsisinnaapput.

Kiisalu meeqqeriviit meeraq qitiutillugu tapersersueqataassapput angajoqqaanut, taamaaliornikkut angajoqqaat perorsaanermi ieriorserneqarsinnaaniassammata.



Peqqinnerulernissamut suliniutit

Peqqinnissaq pillugu kommunimi sullissisut peqqissutsimut nappaatinillu pinaveersaartitsinissamut ulluunerani neqerooruteqarfiusunut ilitsersuinnermut tapertaassapput. Peqqinnissaq pillugu sullissisut aamma meeqqap angajoqqaavinik isumaqatigiissuteqarnerisigut meeqqat immikkut pisariaqartitsisut pillugit sulisunut siunnersuisinnaapput.

Meeqgerivinni eqqiluisaarneq, nunatsinni nakorsaanerup innersuussineranut naapertuutissaaq:

- Ullormut arlaleriartumik silaannarissaaneq
- Sapinngisamik meeqqat silamiittuarnissaat
- Aneereernerit tamaasa, anartarfimmeereernerit tamaasa aamma nerisasserilernerit tamaasa tamatigut errortortarnissaq.
- Pappialamik allarutissaqarnissaq qaqorsaallu maqittagaq atorneqassallutik.
- Kakkiinerit tamaasa errortorluarnissaq.
- Meeqqat ilinniartinneqassapput qitserassanngitsut, qitserartilli iisassagaat.
- Kigutigissaatit sut-ilu ataasiakkaat nammineq pigissavaat.
- Eqqiluisaarneq, takuuk ilitsersuut.